


**LLEISIAU LLANBABS - Trip bythgofiadwy 'Lleisiau Llanbabs' I'r Wyl Ban
Geltaidd yn Carlow, Iwerddon ar Ebrill 13-15, 2012.**

Wel, lle da ni'n dechra?! Sut mae cyfiawnhau bwrwm a mawredd y trip yma i blant bach Llanbabs (a phawb arall) mewn ychydig eiriau? Dyma ein hymgais...

Wedi misoedd o ymarfer a chasglu arian, cyrhaeddodd y diwrnod mawr. Y diwrnod pan deithiodd 77 o bentref Deiniolen i Carlow yn Iwerddon. Cychwynnodd 28 o blant y côr, rhieni, ffrindiau, brodyr a chwiorydd, neiniau a theidiau, o Lanbabs am tua 8 o'r gloch y bore ar ddwy fys gan leuan Williams. Roedd hwyliau da ar bawb wrth deithio na Gaerbybi i ddal y llong drosodd i Dun Laoghaire. Roedd digon o goffi yn y fflasgiau a'r bocsys bwyd yn llawn!!

Roedd hi'n ddiwrnod braf a chilir wrth i ni nesau at Iwerddon, gyda phawb wedi cynhyrfu'n lân wrth feddwl am yr antur enfawr o'u blaena!! Roedd hi'n tua 2 o'r gloch y pawns erbyn i ni gyrraedd Gwesty moethus y Dolmen. Wrth gwrs, gan fod Grand Piano yn nerbynfaf'r gwesty, doedd Anti Lyndsey ac Anti Eleri'n methu ei phasio heb gael ymarfer bach sydyn!! Felly, dyma 'Lleisiau Llanbabs' yn atseinio drwy'r gwesty a phawb wrth eu bodd!! Dyma'r arwydd cyntaf bod plantos bach Llanbabs am roi gwên ar wyneb amryw o bobl yn Iwerddon dros y penwythnos, ac yn wir, dyna a wnaethant!

Yn dilyn bwyd bendigedig, ar ôl dipyn o redeg o gwmpas ystafelloedd eu ffrindiau, bysus Carlow aeth â ni at fan cychwyn yr orymdaith. Plant Llanbabs



oedd yn arwain, gyda bandiau a dawnswyr o bob un o'r gwledydd Celtaidd yn llwio strydoedd tref Carlow.

Diddanu yn Eglwys y Santes Fair oedd y dasg nesa i 'Lleisiau Llanbabs'. Rhannu llwyfan gyda phlant o ysgolion cynradd y dalgylch yn ogystal â chorau

o'r gwledydd Celtaidd. Newid cyfeiriad yn hollol wedyn, gan gerdded drosodd i Westy'r Seven Oaks, ble cynhaliwyd y Noson Lawen. Cymru oedd yn cynnal y noson honno ac, wrth gwrs, roedd y lle yn orlawn!!

Dawnswyr, corau, unawdwyr... ac unwaith eto, Lleisiau Llanbabs



hefyd yn rhoi mwynhad llwyr i'r dorf. Mi aeth hi'n noson hwyr iawn, ond roedd pawb wrth eu bodd! Anodd coelio ein bod ni'n sôn am y diwrnod cyntaf o hyd, ond mi roedd hwn yn drip a hanner, a deud y lleia!!

Dydd Sadwrn, Ebrill 14 - heddiw oedd y diwrnod mawr. Y diwrnod lle roedd Lleisiau Llanbabs yn cynrychioli Cymru mewn dwy gystadleuaeth yn yr wyl. Wedi codi i gael brechwast bendigedig, fwrdd â ni yn y bysus i neuadd yr ysgol leol. Disgwyl yn eiddgar yn un o'r ystafelloedd yn y cefn cyn cael ein galw ymlaen i gystadlu...

Roedd y plantos werth eu gweld ac wedi perfformio'n arbennig o dda. Geiriau caredig iawn gan y beirniad a gadarnhaodd bod Lleisiau Llanbabs wedi ennill yn y ddau categori!! Dwy wobwr gyntaf i blantos bach Deiniolen!! Gwych!! Yn wir, roedd digon o weiddi a dathlu!!

Gan fod y trefnwyr wedi cwirioni gymaint hefo'r plant, cawsant wahoddiad yn ôl i ganu yn y prynhawn i ddiddanu'r dorf. Yma daeth cyfle iddynt hefyd ganu hefo Côr Hÿn Glanaethwy. Wrth i bawb wneud eu ffordd yn ôl i'r gwesty ar gyfer noson arbennig o gymdeithasu a thrafod llwyddiant y côr a'r trip, roedd cynlluniau ar y gweill yn barod ar gyfer trip y flwyddyn nesaf!!

Ac mi fedra i eich sicrhau chi nad coffi oedd yn y fflasgiau y noson honno!!

Diolch i bawb am eich cefnogaeth ac am eich geiriau caredig o longyfarchiadau i gôr plant 'Lleisiau Llanbabs'.

**I longyfarch Lleisiau Llanbabs ar eu llwyddiant yn yr
Wyl Ban-Geltaidd**

Erys encore y côr mewn côr, - i'r lle
ceir llais Llanbabs eiddo.

Asio'n braf wnaeth seiniu bro,
eu harbwy daniodd Carlow.

RLIJ